

**Kingusinnerpaamik UKA2012-imi saqqummiunneqartussamik Aalisarnermik piniarnermillu inuussutissarsiutillit inuussutissarsiornerannik siuarsaaneq pillugu Inatsisartut peqqussutaat nr. 10, 20. november 2006-imeersumut allannguutissatut siunnersuummik Naalakkersuisut saqqummiussinissaannik Inatsisartuni aalajangiiffigisassatut siunnersuut, taamaalilluni taamaallaat umiatsiaaqqanut nutaanut Kalaallit Nunaanni sanaartorneqartunut tapiisoqarsinnaasalersillugu.**  
*(Inatsisartunut ilaasortaq Karl Lyberth, Siumut)*

**pillugu**

**Aalisarnermut Piniarnermut Nunalerinermullu ataatsimiititaliap**

### **ISUMALIUTISSIISSUTAA**

**Siunnersuutip aappaassaaneerneqarnerani saqqummiunneqartoq.**

Ataatsimiititaliami suliaqarnermi ilaasortat uku peqataapput:

Inatsisartunut ilaasortaq Aqqaluaq B. Egede, Inuit Ataqatigiit, Siulittaasoq  
Inatsisartunut ilaasortaq Jørgen-Ole N. Nielsen, Demokraatit, Siulittaasup tullia  
Inatsisartunut ilaasortaq Hans Aronsen, Inuit Ataqatigiit  
Inatsisartunut ilaasortaq Finn Karlsen, Siumut  
Inatsisartunut ilaasortaq Juliane Henningsen, Inuit Ataqatigiit  
Inatsisartunut ilaasortaq Hans Enoksen, Siumut  
Inatsisartunut ilaasortaq Karl Lyberth, Siumut

UKA 2012-mi ulloq 6. november appassaaneerneqarnerata kipineqarnerata kingorna Ataatsimiititaliap siunnersuut misissorpaa.

#### **1. Siunnersuutip imaa siunertaalu.**

Siunnersuuteqartup siunnersuutini tunngavilersorpaa, siunnersuutip taamaallaat Kalaallit Nunaanni suliffeqarfiit qulakkeerneqarnerat kingunerissanngikkaa, aammali avataanit tikerartitanik annikillisaanermut sunniuteqassasoq. Aamma umiatsiat Kalaallit Nunaanni sananeqartartut Kalaallit Nunaanni pissutsinut sanaajupput, taamaattumillu soorunami Kalaallit Nunaanni atugassatut piukkunnartuullutik.

## 2. Siunnersuutip Inatsisartuni siullermeerneqarnera.

**Inuit Ataqtigiit** siunnersuut tapersersunngilaat. **Siumup** siunnersuut tapersersorpaa. **Demokraatit** siunnersuut tapersersunngilaat. **Naalakkersuisut** aalajangiinermi tapersiisoqassanngitsoq inassuteqarput.

## 3. Siunnersuutip Inatsisartuni aappassaaneerneqarnera.

Aappassaaneerinermi siunnersuut Aalisarnermut, Piniarnermut Nunalerinermullu ataatsimiititaliami suliarineqassasoq siunnersuuteqartup qinnutigaa. Naalakkersuisut siunnersuutip itigartinneqarnissaanik inassuteqarnerat siunnersuuteqartup akerlilerpaa, Naalakkersuisut ilaatigut ima allassimammata:

*"Unammilleqatigiinnermut ataatsimiititaliap oqaaseqaammuni oqaatigaa, siunnersuut akuerineqassagaluarpat siunnersuut Unammillerneq pillugu Inatsisartut inatsisaanni § 12, imm. 2-mut akerliussasoq ..."*

Tamatuma kingorna qinnuteqaat akuerineqarpoq, isumaqatigiinniarnerrillu unitsinneqarput, siunnersuullu Aalisarnermut, Piniarnermut Nunalerinermullu ataatsimiititaliami suliarineqartussatut innersuunneqarpoq.

## 4. Apeqqutit

Ataatsimiititaliap siunnersuummik suliaqarneranut atatillugu Aalisarnermut, Piniarnermut Nunalerinermullu Naalakkersuisoq apeqqutinut assigiinngitsunut akissuteqaqqusivoq. Ataatsimiititaliap apeqquteqaatigisaata aamma Naalakkersuisunut ilaasortap akissutaasa assilineqarneri isumaliutissiisummut uunga ilanngussatut tapiliunneqarput.

## 5. Ataatsimiititaliap siunnersuummik suliaqarnera.

Naalakkersuisut isornartorsiuerpalaanngitsumik Unammilleqatigiinnermut Ataatsimiititaliap siunnersuummut uunnga oqaaseqaataanut innersuussinerannut siunnersuuteqartup isornartorsiuinera Ataatsimiititaliap isumaqatigiinnarsinnaavaa.

Inatsisartut oqaluttarfianit saqqummiussat ersarissuunissaasa naammattuunissaasalu pingaaruteqarnerannik Ataatsimiititaliap sakkortunerpaamik naqissusiissaaq. Ataatsimiititaliap isumaa malillugu, Inatsisartut naleqquttumik naammattumillu aalajangiinissaannut tunngavissioortarnissamat Naalakkersuisoq susassaqarfimmi naalakkersuinikkut akisussaasuusoq imikkut akisussaaffeqarpoq.

Taamaattumik Ataatsimiititaliap naqissusissavaa, naalakkersuinikkut amerlanerussuteqarinnikkut tamanna kissaatigineqarpat, siunnersuut una malillugu inatsisinik allannguutissatut siunnersuutit akuerinissaannut Inatsisartut periarfissaat Unammilleqatigiinnermut inatsimmit killilerneqanngimmata, akerlianilluunniit amerlanerussuteqarinnikkut piumasat malillugu itigartinneqarsinnaalluni.

## 6. Siunnersuutip aningaasatigut kingunerisassai.

Ataatsimiititaliap maluginiarpaa, siunnersuutip aningaasatigut kingunissai siunnersuuteqartup taasimagai. Tunngaviliussatut takuneqarsinnaasut malillugit allatut naliliinissamut pissutissaqanngitsoq Ataatsimiititaliaq isumaqarpoq.

## 7. Ataatsimiititaliap inassutai.

Ataatsimiititaliami amerlanerussuteqartut Inuit Ataqatigiinneersut aamma Demokrati-neersut siunnersuut pillugu ima oqaaseqassapput:

Ataatsimiititaliami amerlanerussuteqartut marlunnik pissuteqarlutik siunnersuut akuerineqassasoq inassutigisinnaanngilaat. Siullermik siunnersuut una naapertorlugu kingusinnerpaamik UKA 2012-mut atatillugu allannguutissatut siunnersuummik saqqummiussinissamut Naalakkersuisut peqquneqarnissaat amerlanerussuteqartut isumaat malillugu pivusorsior-tuunngilaq. Aappaattut siunnersuutip unammilleqatigiinnermut eqqutitsisutut siunertaqarnera amerlanerussuteqartut akuerisinnaanngilaat.

Inuussutissarsiutigalugu umiatsiamik pineqartup pisariaqartitaa pillugu naleqquttumik toqqaanissamut tapiissutinik pissarsisup killilerneqarnissaa, imaluunniit kiffaanngissuseqarluni unammilleqatigiinnermik susassaqarfiusumi kikkulluunniit naligiimmik periarfissaqarlutik ingerlatsinissaannut killiliinissaq amerlanerussuteqartut kissaatiginngilaat. Malittarisassat ullumikkutut itsillugit inuussutissarsiutigalugu umiatsiat Kalaallit Nunaanni inuussutissarsiutigalugu umiatsiatut atugassatut akuerisaassasoq amerlanerussuteqartunut pingaarneruvoq kiisalu naammalluni. Amerlanerussuteqartut Naalakkersuisut isumaqatigaat, nioqquteqartarnermi unammillernermit killiliinermik, kiisalu umiatsiamik toqqaanissamut atuisup killilerneqarnissaanik aamma kalaallimut atuisumut iluaqutaanngitsumik akit qaffannerannik siunnersuut kinguneqassasoq. Amerlanerussuteqartut aamma isumaqarput, tamanna piujuartitsineq tunngavigalugu inuussutissarsiornikkut ineriartortitsinermut ataqatigiissikkumi-naassasoq.

Tamanna tunngavigalugu ataatsimiititaliami amerlanerussuteqartut qulaani taaneqartut siunnersuut itigartinneqassasoq inassuteqarput.

Ataatsimiititaliami ikinnerussuteqartut Siumumeersut siunnersuut pillugu ima oqaaseqassapput:

Siumup siunnersuuteqartup siunnersuumminut siunertaa tunngavilersuutaalu tapersorsorluinnarpaa. Siumut isumaqarpoq, siunnersuut inuussutissarsiutinut allanut pisortanit tapiissuteqartarnermit allaanerussuteqanngitsoq. Tamatumani aalisarnermut, piniarnermut nunalerinermullu pisortanit tapiissutit Kalaallit Nunaata avataani aamma atugaasaqisut Siumup

eqqarsaatigai. Akerlinganik Siumup pingaaruteqarsoraa, nunani allanisuulli nunatsinni tunisassiornikkut immitsinnut pilersornitta isumannaarnissaanut iliuitsit tapersornissaat, kiisalu siunnersuutikkut suliffissaqarneq nunatsinnilu nioqquteqarnermik ingerlatsinissaq qulakkeerinneqataaffigineqassat. Siumut aamma isumaqarpoq, aningaasat ima amerlatigisut pineqangitsut, allaat kiffaangissuseqarluni unammilleqatigiinnermut innarliisinnaanermik kinguneqarsinnaalluni.

Siunnersuut una naapertorlugu kingusinnerpaamik UKA 2012-mut atatillugu allannguutissatut siunnersuummik saqqummiussinissamat Naalakkersuisut peqquneqarnissaat angumeneqarsinnaanngitsoq ikkinnerussuteqartut paasivaat.


**Tamanna tunngavigalugu ataatsimiititaliami ikinnerussuteqartut allannguutissatut siunnersuut imaattoq saqqummiuppaat:**

Kingusinnerpaamik UPA2013-imi saqqummiunneqartussamik Aalisarnermik piniarnermillu inuussutissarsiutillit inuussutissarsiorterannik siuarsaaneq pillugu Inatsisartut peqqussutaat nr. 10, 20. november 2006-imeersumut allannguutissatut siunnersuummik Naalakkersuisut saqqummiussinissaannik Inatsisartuni aalajangiiffigisassatut siunnersuut, taamaalilluni taamaallaat umiatsiaaqqanut nutaanut Kalaallit Nunaanni sanaartorneqartunut tapiisoqarsinnaasalersillugu.

Taamatut oqaaseqarluni isumaliutissiissummilu allassimasutut paasinnilluni ataatsimiititaliap siunnersuutit aappassaaniigassanngortippaa.

*Aqqaluaq B. Egede*

Aqqaluaq B. Egede,  
Siulittaasoq




Jørgen-Ole N. Nielsen,  
Siulittaasup tullia



Hans Aronsen




Finn Karlsen



Juliane Henningsen



Hans Enoksen



Karl Lyberth



Inatsisartut Aalisarnermut, Piniarnermut Nunalerinermullu ataatsimiititaliaat  
sakkak@inatsisartut.gl

INDGÅET

BILAG

22 NOV. 2012

### UKA2012/90 pillugu

21. november 2012  
Sagsnr. 2012-064192  
Dok. Nr. 1071976

2012-imi ukiaanerani ataatsimiinnermi immikkoortup 90-ip aappassaaneerlugu oqaluuserineqannginnerani ataatsimiititaliap allagaa 20. november 2012-imeersoq tigusimavara. Ataatsimiititaliap oqaluuserisamat isumaliutissinissaanut allakkami apeqqutit sisamat apeqqutigineqarput. Naalakkersuisut sinnerlugit apeqqutinut akissutit uku nalunaarutigissavakka:

Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apnn@nanoq.gl  
www.nanoq.gl

Apeqqut 1-imut: Aap, Naalakkersuisut ataatsimiititaliap paasinninnera isumaqatigaat.

Apeqqut 2-mut: Aap, Naalakkersuisut ataatsimiititaliap paasinninnera isumaqatigaat.

Apeqqut 3-mut: Aap, Inatsisartut unammilleqatigiinnermut innarliisumik inatsimmik akuersissuteqarpata, taava Unammilleqatigiinneq pillugu Inatsisartut inatsisaat nr. 16, 19. november 2007-imeersup (Unammilleqatigiinnermut inatsisip) § 12, imm. 2, nr. 2 malil-lugu pisortanit aqutsinerussaaq, taamaallunilu Unammilleqatigiinnermut Ataatsi-miititaliap akuliusinnaanermut piginnaatitaanerani ilaatinneqassanani.

Apeqqut 4-mut: Naalakkersuisut takusinnaavaat inatsisip § 12, imm. 2, nr. 2-mut inner-sunneqarnera tulluartsinnaasoq. Taamaattoq tassunga atatillugu Naalakkersuisut erseqqissaatigissavaat Naalakkersuisut immikkoortumut isummernertik allan-gortinngimmassuk.

Immikkoortup siullermeerneqarnerani siunnersuummut akissuteqaat innersuussutigalugu Naalakkersuisut suli isumartik aalajangiusimavaat, tamannalu pillugu Unam-milleqatigiinnermut ataatsimiititaliap siunnersuummut naliliinera isumaqatigalugu, taa-maammallu siunnersuut akueriumanagu.

Inussiarnersumik inuulluaqqusiffunga  
Med venlig hilsen

Ane Hansen



Aalisarnermut, Piniarnermut Nunalerinermullu Naalakkersuisoq  
Ane Hansen  
/MAANI

Ulloq 20. november 2012  
Sags.nr.: 01.36.01.04-00075

### **Pineqartoq: UKA 2012/90**

#### **Tunuliaqut:**

UKA 2012-mi ulloq 6. november appassaaneerneqarnerata kipineqarnerata kingorna Ataatsimiititaliap siunnersuut misissorpaa. Tassunga tunngatillugu uku apeqqutit akissuteqarfigineqassasut ataatsimiititaliap kissaatigaa.

#### **Apeqqut 1:**

Tapiissutitut unammilleqatigiinnermik equtitsisunut atatillugu Unammilleqatigiinnermut ataatsimiititaliap pequssuteqarnissaminut periarfissai marluupput, taakkulu marlut tamarmik § 12, imm. 2-mik naammassinnissimassapput. Unammilleqatigiinnermut ataatsimiititaliap isumaa malillugu, piumasaqaat siulleq tassaavoq, tapiissut pineqartoq toqqaannartumik toqqaannangitsumilluunniit unammilleqatigiinnerup equtinnissaanik siunertaqarpat imaluunniit kinguneqarpat. Piumasaqaatip aappaa tassaavoq, tapiissut unammilleqatigiinnermut equtitsisoq pisortat aqutsinerat naapertorlugu inatsisinik unioqqutitsineruppat. Unammilleqatigiinnermut inatsisit naapertorlugit unammilleqatigiinnermut equtitsisumik pisortat tapiissuteqarsimarnersut pillugu Unammilleqatigiinnermut ataatsimiititaliaq naliliisarpoq, pisortallu aqutsinerat naapertorlugu tapiissut naapertuuttuunersoq pillugu Naalakkersuisut naliliisarlutik.

### **Ataatsimiititaliap qulaanitut paasinninnera Naalakkersuisunit isumaqatigineqarpa?**

#### **Apeqqut 2:**

Ataatsimiititaliap isumaa malillugu, tamanna tunngavigalugu siunnersuut isiginiarneqassaaq. Taamaattumik Ataatsimiititaliap naqissusissavaa, naalakkersuinikkut tamanna kissaatigineqarpat, siunnersuut una malillugu inatsisinik allannguutissatut siunnersuutit akuerinissaannut Inatsisartut periarfissaat Unammilleqatigiinnermut inatsimmit killilerneqangimmata. Allatut oqaatigalugu siunnersuut politikikkut amerlanerussuteqarnikkut akuersissutigineqarsinnaavoq akerlianilluunniit amerlanerussuteqarnikkut piumasaat malillugu itigartinneqarsinnaalluni.

### **Ataatsimiititaliap qulaanitut paasinninnera Naalakkersuisunit isumaqatigineqarpa?**



## INATSISARTUT

### Apeqquut 3:

Siunnersuut una akuerineqassappat, taamatut pissuseqarnerani unammilleqatigiinnermut inatsimmi § 12, imm. 2, nr. 2 malillugu inatsit pisortat aqutsinerattut isigineqassaaq, taamaallillunilu Unammilleqatigiinnermut ataatsimiititaliap akulerunnissamik piginnaatitaaffiit ilaassanani.

### Ataatsimiititaliap qulaanitut paasinninnera Naalakkersuisunit isumaqatigineqarpa?

### Apeqquut 4:

Naalakkersuisut ilaatigut ima allassimmammata:


*"Unammilleqatigiinnermut ataatsimiititaliap oqaaseqaammini oqaatigaa, siunnersuut akuerineqassagaluarpat siunnersuut Unammillerneq pillugu Inatsisartut inatsisaanni § 12, imm. 2-mut akerliussasoq ..."*

**Unammilleqatigiinnermut inatsimmi § 12, imm. 2, nr. 2-mi aalajangersagaq isiginiarlugu oqaaseqatigiit taakku tamakkiinerusinnaasutut ataatsimiititaliamit isigineqarnera Naalakkersuisunit isumaqatigineqarpa?**

\*\*\*\*\*

Akissutit kingusinnerpaamik sisamangornermi 22. november kalaallisut danskisullu qaraasaakkut uunga nassiutequneqarput: [sakkak@inatsisartut.gl](mailto:sakkak@inatsisartut.gl).

Inussiarnersumik inuulluaqqusillunga

  
Aqqaq B. Egede

Ataatsimiititaliami Siulittaasoq,  
Aalisarnermut, Piniarnermut Nunalerinermullu ataatsimiititaliaq